

2 Tésárónáíka Ebeq sáhnsahwe ahṭebé ehwéhne.

Táhmaro Tésárónáíka suwahpeqte kégá Sísaga tūna tanáhráqsábé múguwahgu iwiáhéra, Wega aiq kowekuraire ue síwáhnoruwe. Poraga mi ehwéh irena mi kegá aiq pútaq ehwéh siahtebageheéna mah pahsí sehiranúwe. Wega sensabé, Péhe éhwéh pehragéq taorahoiyehboq Sísa itene Wahnahne sánsá tauntahunue sehgióro ue mah pahsí sehiranúwe.

Poraga Tésárónáíka suwahpeqte ké anehe siu pahsíe.

¹ Ite apáhránító íwíq Pora, Sáíra, Tímóti, míone. Itene páhsí sáhnsahwe tagahro. Tésárónáíka suwahpeqte Sísa tagariáh kéo, itewe Maniká Iteriboreq Sísa Karáhé itene Wahhnahnseq moraráq mía míaowe.

² Mía míaonsabé Maniká Iteriboreq Sísa Karéherekka ite séhréh aitera itene iru ukiq itagéhe.

*Íre kaweq sunúqkákáq Sísa tagariáh kégá wene
sánsá kawerue sehgiro ehwéhne.*

³ Itene iyahnabo anímáríno, Sísane sánsá aiq kawerue ahṭebéq tábúsoqme sehgirowe. Itega wensabé wensabé arutaboiratéhowe. Menah peh ákáhtaq ahṭebéq irutaboirurowe. Amahnága anotahtaq ahṭebéq irutaboirurowe. Minayabe itensabé

ahreraq matawéq Manikánsabe kaweróne ateq iwíah íwíahúne.

4 Íre kaweç sunúq mó kegá íwíoqnaroتاq itega Sísane sánsá kawerue ambubu atawéq sehgirowe. Anetaníbo íwíah íre iwíahia peh Sísansabé aiq pútare ateq wene sánsá tábúsoqme miraowe. Minayabe ite mó kehiná suwahpeq Maniká tagariáh kéreq míonaraq itene kaweç sansá teri terinúne.

Sísaga tuinagake we íre tagariáh ké kamah arie ehwéhne.

5 Sísane sánsá sehgirö puara mó kegá íwíoqnahwe. Minayabe Manikánka itensabé, Kawerowe aitahnaq mókake wega wahnahnirabeq awaq miagéhe. Wega wehuke saraqme sainsuahnaraq peh tábúsoqme mirainkehe.

6 Manikánka peh tábúsoqme sansánue ite íwíoqnah ke ehweh págegeue kamah arinkéhe.

7 Sísaga íópeqté tuinagake itereq itereqne íérime parabaruankéhe. Mitaqkake itene Wahnah Sísareq wene págege íópeqté kéreqka anotah iróbínánínaakáq tuoneherawoe.

8 Túírataq ite Manikánsabe iuwahriehre éra Sísá itene Wahnahne ehweh íre sehgió ké anotahtaq kamah arinawire.

9 Kamah arinara se itene Wahnah míéhrabeq ahriahri íre míaneherawoe. Wega téhrehrabéq págegeue arambehriirabeq íre míaneherawoe. Se peh iraipéq ahriahri méra síérínayabé kamah oneherawoe.

10 Sísá tuina wehekáh we tagariona ke, wensabé aiq pútare atona kegá wensabé anotahtaq iwíah íwíah atanéhe. Itega teiátáuna ehwéh Sísá

éhwehnsabé aiq pútare uro puaq ite moq mitaq méq wensabé iwíáh iwíáh atagéhe.

Sísa tagaríáh kégá wene ehweh kawerue sehgige-heéra púreru ehwéhne.

¹¹ Mókake sína tanáhráqté náneqsabé iwíáhquéq itensabé púreréq, Séhréh arito ue púreraita aitaúne. Manikánka ite omaq itena, Kaweq sansánoro aitáráire. Ite Manikánsabe aiq pútare ateq kaweq arámbéhríoneheqmúne urowe. Itega moke wega teiu naneq kawerue miraigeheéna págege aito ue púreraitone.

¹² Itene anotah Wahnáh Sísa áwíq pankereq wensabé iwíáh iwíáh atagehehehéq púreraitone. Wene sánsá kawerue mirairataqmé Maniká Iteriboreq itene Wahnah Sísa Karáhéreqka iteíwíq pankerera kawerowe aitera ite séhréh aitagéhe.

2

Manikáne ehwehnsabé awahrieh aní éhwelne.

¹ Itene iyahnabo anímáríno, itene Wahnah Sísa Karáhégá tuinagake itereq míageheéna tumeirankéhe. Mi tanáhráq múguwahgu iwíáhiyehoéna kawerue irageheéna teiníe.

² Mi wehekáh aiq sótaikuraire e ke míáhwe. Mó anínká iwíáhénéa, Manikáne Awanka iwíáh aintáráime aiq sótaikuraire uraire. Mó anínká Manikáne ehweh síwáhnoréna, Aiq sótaikuraire uraire. Mó anínká péhenéna, Ite Porarehga páhsipéq mi wehekáh aiq sótaikurai ewhéh aiq sehiranurowe uraire. Sene ehweh írátíowana iwíáh kikirirana irupipeq íre kawerínehboq Sísa aiq tutaire uro ewhéhnsabé íre aiq pútare arítáhro.

3 Péhe éhwéhnsábé aiq pútare arítéhboq írátíáhro. Sísá tuina wehekáhmé íre pehipi tuinawire. Írakaumo. Ebeqme áhnte saiyo kegá Sísane sánsá suera wensabé ahqáho ataneherawoe. Mitaqkake Manikáne ehwehnsabé awahrieh anímé, iraipéq míanaína anímé ábóraraginawire.

4 Áhnte kegá, Mina itene maniká míre éra iwíáh iwíáh atáhwe. Ábóraragína anínká moke mi naneqsabé ahqáho inawire. Minawarimé abehq nánere éna wenawíq pankerena ínébataq anotah aní múge inawire. Manikánsabe iwíáh iwíáh atona nahtápéq kiwéna, Íné Maniká múge inawire.

5 Iteba míarautaq mah ehwéh aiq teiátáuge. Minawé aiq ibitagiro?

6 Mi aní amahnága íre ábóraq míahrahinsabé tagariáhwe. Manikánka mi tanáhráq aiq awehraq mire iwíáhínaraqmé we ábóraraginawire.

7 Amahnága ahkaragára sansámárimé peh kopípéq kéhre. Ahkaragáraka saiqnariéh áninká pokínaraq mi sansá ábóraraginawire.

8 Téhwe Manikáne ehwehnsabé awahrieh anínká ábóraragínana anehe Sísá tuinae. Itene anotah Wahnáh téhreh naneqkakáq tuinaraq wene áwéhipeqté éúqká mi aní tabiqsuankéhe. Téhreh naneqka mi aní íre kaweraruanawire.

9 Manikáne ehwehnsabé awahrieh aní sínaraq owainawanka págege atahna puana wega péhe ótáq sánsánkákáq íre miraorahi sansánkákáq mirainawire.

10 Mi anínká áhnte ahbábáq sánsá miraéna iraipéq pokira keyábé wene péhe sánsánsábé, Aiq pútare aintáhro aritanawire. Segá aiq pútaq ehwéh

Manikáne kawerarite ehwehnsabé suwahriáhna puara mi aníné péhe sánsánsábé aiq pútare atera iraipéq pokigehe.

¹¹ Minayabe Manikánka sene iwíáh íre kawerari-tanae. Sega aiq pútaq sansánsábé, Ite iuwahriehre ira puana Manikánka péhe sánsánsábé aiq pútare atáhro inae. Minayabe se péhe sánsánsábé aiq pútare atagéhe.

¹² Segá aiq pútaq ehwéhnsabé íre aiq pútare atera peh ahbabáqsabe suwahbáhna puana Manikánka anotah ehwéh aritena sainsuanawire.

Manikánka ite meirena kaweraitankehééna aiq omaq ito ehwéhne.

¹³ Itene iyahnabo anímáríno, Manikánka itens-abé arutaboiraitéhre. Itega íre ibitarusa peh itens-abé iwíáhéq wensabé iwíáh iwíáh atone. Wega ite meirena kaweraitankehééna téh omaq itowana Wenawanka ite kaweqlaq míageheéna moq omaq itowe. Itega wene ehwéhnsabé aiq pútare atáro puana Manikánka kaweraitaráire.

¹⁴ Itega teiátáúna ehwéh aiq pútare aitárónsabé itene Wahnhah Sísa Karáhé téhrehnkakáq míéhrabeq pokigeheéna omaq itowe.

¹⁵ Minayabe íwáhnorurauna sansá ambubu atíáhro. Itene iyahnabo anímáríno, mi sansá íwéhipeqté éhwéhnikákáq páhsipiqté éhwéhnikákáq íwáhnoruraune. Mi ehwéh kawerue ambubu atíáhro.

¹⁶ Itene Wahnhah Sísa Karáhéraq Maniká Iteriboreqka itensabé sirutaboiróye. Sega itene irupipeq aiq kaweraitáróyansabé itene irupipeq ahriahri eyoyóinae. Ite séhréh aitera ogá mía míaoneheqmúne iwíáh aitáráoye.

17 Itega kaweq arámbéhriéq kaweq ehwéh irarigeheéra sega ite kawerue séhréh aitera págege aitagéhe.

3

Manikánka ite séhréh aitankéhboq púreraitáhro i ehwéhne.

1 Itene iyahnabo anímáríno, mó ehwéh kéhre. Sísa itene Wahnahne ehwéh abae aginkehboq itensabé púreraitáhro. Itega mi ehwéh téh írátótaq kawerue ireq ambubu atiarowe. Mó kegá mina onserahnigehboq púrerarítáhro.

2 Sísane ehwéh teriunaraq mi ehwéhnsábé mó kegá aiq pútare atáhwara mó kegá íre aiq pútare atáhwe. Íre aiq pútare atáh ké ahkaragára ahbabáq kega iubiyehboq púreraitáhro.

3 Itene anotah Wahnáhnká anetaníbo íwíáh íre iwíáhia peh kawerue wahnahnaitankéhe. Owainawanka ite ahbabáraitehnehoéna itene anotah Wahnáhnká séhréh aitená págege aitankéhe.

4 Sehgíoro urauna ehwéh aiq kawerue sehgiówe. Itega iwíáhúnawe, Mókakeakáq kawerue seh gigéhe íwíáhúne. Itene Wahnahnka mi iwíáh aitéhrana irupipeq kawerire.

5 Itene anotah Wahnáhnká iwíáh aitahnaq Manikánka arutaboiri sansá iahtebagehe. Sísa Karáhéga wene arambehri ambubu atawéna kawerue sehgiunserah miraigehe.

Ómiga arambehrioro i ehwéhne.

6 Itene iyahnabo anímáríno, itene anotah Wahnáh Sísa Karáhé áwírue teiníe. Táhmaro Sísa

tagariáh kégá taorahoéra íwáhnorurauna ehwéh anterúáhwe. Mina tahnsa kéreq íre míáhro.

⁷ Ite tagariáhmé iteba míaraunaraq íre taora-houraune. Itega miraurauna serahnoro.

⁸ Iteba míaraunaraq itene tópah pehipi íre na-raune. Írakaumo. Inokáhpeqkakáq wéhékáhnkakaq págegeue arambehriuraune. Iru págege aitéhoéq íre ineh inehia itene táhutahuqsabé arambehri-ruane.

⁹ Íwáhnorúnayabé itega táhutahuq náiéro iraru-rauno? Írakaumo. Náiéro íre iraruraune. Itega arambehriurauna sansá tagéq mina tahnsanige-heéq mirauraune.

¹⁰ Iteba míaraunaraq mahraréq, Arambehriyabé taorahoí aní tópah íre náriéro uraune.

¹¹ Amahnága ite táhmaro peh taorahoéq íre aram-behriowe. Peh íre itereq wehgariraq irare irare-owe. Minayabe mó kegá teiátowaq írátáúne.

¹² Itene anotah Wahnáh Sísa Karáhé áwírue tao-raho keyabé mah ehwéh teríero aitone. Mahraréq, Itene táhutahuq mewe nagehboq tabasíwe méq kawerue arambehrioro teríero.

¹³ Itene iyahnabo anímáríno, kaweç sansá miraéyabe taorahoiyehboq peh ahriahri mira aruqaruroro.

¹⁴ Mah pahsíípéqté éhwéh anteruahna aní peh áwé tagahro. We ayehitawiankéhboq pehragéq weba íre kowíáhro.

¹⁵ We naruо aní míre íwíáhiyeho. We iteruwahrah aní púana wega tábúsoqmé iwíáhinkehboq peh kaweç sansánúno págegeue teawéro.

Iru ukiq itahráhi ehwéhne.

16 Itene anotah Wahnáhmé iru ukiq itahráhi aníne. Kaweq sunúqkákáq íre kaweq sunúqkákáq ahriahri wega itene iru ukiq itahráhire. Wega itene iru ukiq itena iteba mía míainkeheeéq púrerúne.

Porane páhsí parabaginai ehwéhne.

17 Íné Poraga amahnága ínénéne niyahtate mahna parabaginai ehwéh sehiranuge. Moke ínéga iátáu pahsí mahna tahnsa séhírá káráire. Mahna tahnsa séhíramé peh ínénéne sehirá míre.

18 Itene anotah Wahnáh Sísa Karáhéga ite moke séhréh aitéhre.

**Manikáne O Ehwehne
God's New Talk: The New Testament in the Awa
Language of Papua New Guinea
Nupela Testamen long tokples Awa long Niugini**

copyright © 1974, 1997 Wycliffe Bible Translators, Inc.

® Faith Comes by Hearing

Language: Awa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-12-11

PDF generated using Haiola and XeLaTeX on 28 Dec 2024 from source files dated 31 Aug 2023

9673cf68-887a-574e-9ac8-846469c86b12